

## 1.05 DEJ NYAB NTIAJTEB

**Chivkeeb 6:11 – 22; 7:11 – 23; 8:14 – 22**



Ntau xyoo dhau los, tibneeg hauv ntiajteb no yim coob zuj zus tuaj. Tsis tas li ntawd, tibneeg feem coob puavleej xaiv yam phem thiab ua lub neej limhiam. Tej no ua rau Vajtswv chim heev thiab tu siab kawg rau qhov tau tsim muaj tej neeg zoo li ntawd. Thaum kawg tsuas tshuav tib txojkev uas Vajtswv xaiv los cawm kom tibneeg dim ntawm txojkev txhaum thiab kev limhiam nyob hauv ntiajteb no yog tso dej los nyab ntiajteb.

Tiamsis, tseem muaj ib tug neeg ua tau lub neej zoo thiab sawv rau sab yog. Nws hlub Vajtswv thiab ua txhua yam raws li tej uas Vajtswv qhia. Nws lub npe hu ua Nau-es. Vajtswv qhia rau Nau-es paub hais tias Vajtswv yuav rhuav lub ntiajteb no tiamsis Vajtswv coglus hais tias yuav cawm nws thiab nws tsev neeg. Vim li ntawd, Vajtswv muab ib tug qauv ua nkoj rau Nau-es thiab qhia kom Nau-es paub ua lub nkoj ntawd. Vajtswv qhia rau Nau-es paub tias yuav ua ib lub nkoj loj siab thiab dav li cas, qhia lub chaw yuav ua lub nkoj ntawd tso rau qhov twg thiab tseem qhia txog kev vov lub nkoj thiab. Rau qhov Nau-es ntseeg siab rau Vajtswv, nws thiaj ua txhua yam raws li Vajtswv qhia.

Ntu sijhawm Nau-es thiab nws tsev neeg ua lub nkoj, tej neeg nyob ib ncig ntawd txob thuam thiab luag hais tias tsev neeg ntawd vwm lawm. Txawm li ntawd los Nau-es tuav kev ntseeg ruaj khov kho thiab rau siab ntso ua lub nkoj ntawd kom tiav raws li Vajtswv hais.

Thaum npaj tau txhua yam tiav tag, Vajtswv hu kom Nau-es cia li nrawm nroos coj nws pojniam, peb tus tub thiab peb tus nyab nce saum nkoj. Vajtswv ua rau txhua yam tsiaj los tsheej nkawm, muaj tus txiv thiab tus niam lawv los rau hauv lub nkoj. Thaum txhua yam los tagnrho rau hauv lub nkoj ces Vajtswv muab qhov rooj nkoj kaw nkaus. Dhau ntawd, Vajtswv tso nag los laublug saum ntuj los tau plaub caug hnuv plaub caug hmo. Dej txawm nyab siab zuj zus puv nkaus txhua lub roob, lub roob uas siab tshaj hauv ntiajteb no los nws nyab ploj tagnrho. Tej neeg tuag tagnrho, tsis muaj ib tug dim li tsuas tshuav cov uas nyob hauv lub nkoj xwb. Dej nyab tagnrho lub ntiajteb no tau 150 hnuv.

150 hnuv dhau mus ces lub nkoj ntawd los khuam rau saum ib lub roob. Tom qab uas Nau-es tos tau ntau hnuv ntxiv, Nws mam qhib qhovrais nkoj tso ib tug ualag ya tawm mus, thiab nws pheej tso tus noog ntawd ya li ntawd txog thaum dej nqig zuj zug. Tom qab ntawd Nau-es ho rov qab tso ib tug nquab ya tawm mus ntxiv, tiamsis tus nquab ya rov qab los hauv lub nkoj rau qhov nws nrhiav tsis tau chaw tsaws. Tau xya hnuv tom qab ntxiv, Nau-es ho rov qab tso ib tug nquab ya tawm mus ntxiv. Zam no tus nquab kwv tau ib rev nplooj txiv ntoo roj los. Thaum Nau-es pom li ntawd nws thiaj paub hais tias dej nqig ti av thiab tej nplooj ntoo hlav lawm. Nau-es ua siab ntev tos xya hnuv ntxiv, nws rov qab tso lwm tus nquab ya tawm mus ntxiv, zaum no tus nquab tsis ya rov qab los lawm. Rau qhov dej twb qhuav tag lawm.

Nau-es thiab nws tsev neeg nrog txhua yam tsiaj puavleej tawm tagnrho hauv lub nkoj los. Nau-es thiaj li los ua ib lub thaj pehawm thiab ua Vajtswv tsaug. Vajtswv coglus rau Nau-es hais tias txij no mus Vajtswv yuav tsis tso dej los nyab lub ntiajteb no ntxiv lawm. Vajtswv thiaj muab tus zaj ua lub cim nias tseg rau Vajtswv lo lus cogtseg rau saum nruab ntug.

**Ntawv Nhauj 7:10** “Vajtswv yog tus tiv thaiv kuv; nws cawm cov neeg uas hwm nws”

## 1.05 DEJ NYAB NTIAJTEB – RAU TUS QHIA

Chivkeeb 6:11 – 22; 7:11 – 23; 8:14 – 22



### Tej tseem ntsiab lus:

- 1) Tibneeg hauv ntiajteb no yim coob zuj zus tuaj. Lawv tsis mloog Vajtswv lus thiab ua tej kev phem xwb. Vajtswv txiav siab yuav muab lawv rhuav puagtsuaj. Vajtswv thiaj tso dej dag los nyab tagrho lub ntiajteb kom txhua yam tuag tag.
- 2) Muaj ib tug txivneeg xwb uas mloog Vajtswv lus npe hu ua Nau-es. Vajtswv hais rau Nau-es hais tias lub ntiajteb no yuav raug dej dag nyab kom tuag tag. Vajtswv qhia kom Nau-es ua ib lub nkoj loj heev, hu ua Nau-es lub nkoj. Lub nkoj no yuav cawm tau tibneeg thiab tej tsiaj dim dej nyab raws li Vajtswv npaj.
- 3) Ze hnuv dej dag nqig los, Vajtswv hu Nau-es kavtsij koj tagrho nws tsev neeg nce saum lub nkoj – pojniam, peb tus tub thiab peb tus nyab. Thiab kom koj txhua yam tsiaj ib yam ib nkawm, ib tug niam ib tug txiv. Thaum txhua yam mus tag rau hauv lub nkoj ces ntuj pib los nag.
- 4) Dej dag nyab lub ntiajteb tau 150 hnuv. Tom qab ntawd lub nkoj los khuam rau saum ib lub roob. Nau-es tso ib tug uablag ya tawm mus thiab rov qab tso ib tug nquab ya tawm mus ntxiv. Nau-es xav paub tias saib tawm av qhuav lawm tsis tau. Tsuas tshuav tus nquab ya rov los xwb. Ib tsam ntxiv, Nau-es ho rov qab tso dua lwm tus nquab ya tawm mus. Zauv no tus nquab mus kwv tau ib rev nplooj txiv ntoo roj los. Qhov no qhia tau tias dej dag twb nqig tag lawm. Lub ntiajteb twb qhuav lawm.
- 5) Nau-es thiab nws tsev neeg qhuas Vajtswv rau qhov dej dag twb nqig tag. Vajtswv muab ib tug zaj tso rau saum nruab ntug ua lub cim rau Vajtswv lo lus cog tseg, Vajtswv yuav tsis tso dej dag los nyab ib zaug ntxiv lawm.

### LUS NUG:

- 1) Vajtswv txiav txim siab ua dabtsi rau lub ntiajteb no thaum tej kev phem kev qias thiab kev ua limhiam huam loj tuaj?
- 2) Leej twg yog tus uas ntseeg thiab mloog Vajtswv lus?
- 3) Vajtswv kom Nau-es ua dabtsi?
- 4) Leejtwg yog cov yuav nce rau saum lub nkoj?
- 5) Tus noog twg kwv tau ib rev nplooj txiv ntoo roj los qhia tau tias lub ntiajteb rov qhuav li qub lawm?
- 6) Vajtswv ua lub cim dabtsi rau Nau-es hais tias Vajtswv yuav tsis tso dej los nyab lub ntiajteb ntxiv lawm?

### LUS TEB:

- 1) Vajtswv txiav txim siab tso dej dag los nyab lub ntiajteb no.
- 2) Nau-es.
- 3) Vajtswv kom Nau-es ua ib lub nkoj.
- 4) Nau-es tsev neeg, pojniam, peb tus tub, peb tus nyab, thiab txhua yam tsiaj ib yam ib nkawm.
- 5) Nquab.
- 6) Vajtswv muab ib tug zaj tso rau saum nruab ntug ua lub cim hais tias Nws yuav tsis tso dej dag los nyab ntiajteb ntxiv lawm.

Vajtswv tau pab Nau-es thiab nws tsev neeg dim los ntawm dej nyab ntiajteb. Tswv Yexus twb txhiv peb sawvdaws kom dim txoj kev txhaum los ua Vajtswv tsev neeg lawm thiab.